



SUTTON PARK SCHOOL
89 Vine Street, Mangere East, Auckland 2024
Telephone (09) 276 4560 Facsimile: (09) 276 4529

Principal: Fa'atili Iosua Esera

11 Aperila 2020.

Tatalo pea o loo manuia outou uma ma o outou aiga a o tatou ia i le vaega 4 o le vavao a le malo. E talitonu a outou tausisi i lapata'iga mai le malō, ali'i ma tama'ita'i o le matagaluega mo le soifua maloloina, o le a fa'apea ona malutia outou mai siama o le fa'ama'i. E mana le fesoasoani a le Atua i e mua'i saili i auala e malutia ai. O lea e valuvalusia ai pea lava pea, a'a o le la'au, ina ia outou tausia fa'atinoga e tete'e atu ai i le fa'ama'i tele o loo lamatia ai le lalolagi atoa.

O le Aso Lulu nei, 15 Aperila e amata ai le kuata lona lua o le tausaga fa'alea'oa'oga. Peita'i o le a tatou iai pea i le vavao a le malō o loo fa'asāina ai le solia o le lotoā o a'oga uma. O mea a'oga ma su'esu'ega a le fanau o le a faia lea i luga o le Upega o Tafailagi. O loo galulue fe'oe'oea'i ia le vasega o faiaoga ma le Ofisa o Aoga i auala e lagolago ai le fa'atinoga o a'oga a le fanau a o tapunia a'oga.

Fa'afetai atu i a'iga sa tali mai i su'esu'ega sa fai e fia iloa ai a'iga e mafia ona fa'aaoga le au'aunaga, o le fa'aaogaina o le Upega o Tafailagi mo a'oga a le fanau. Fa'afetai atu i matua sa fa'afeso'ota'i mai a'u. Ua uma ona logo ia faiaoga o ta'ita'ia lea galuega, ina ia malamalama ai. Ma o lea e momoli atu ai le fa'amalō ia Mrs Lakokiperitania ma Mr Lemanu o loo gafa ma le mamafa o lea 'au'aunaga.

Mo a'iga e mafai ona asia le upega o tafailagi ma iai masini ma 'au'upega e fa'atino ai a'oga a le fanau, e tele na'uā ia mea-aoga a tamaiti i luga o le Upega o Feso'otaiga ma le Upega o Fesaga'iga a le a'oga. O le a galulue pea ia ta'iulu o itu 'ese'ese o le a'oga ma le 'aufaigaluega atoa i le lagolago o le a'oa'oina o fanau a tapunia falea'oga.

O le a amata fo'i ni isi o a'oga a le fanau mai le Aso Lulu 15 Aperila, i luga o le televise. E lagona le fiafia i le aia o se ala-televise o le maua ai a'oga i le gagana Maori, ona o le tele o a'iga o alo ma fanau Maori, e le o iai se isi e tautalagia le gagana Maori.

O lea e tatalo atu ai, a le mafai ona asia le Upega o Tafailagi, fa'amolemole e fa'aogā leni avanoa matagofie, e fesoasoani ai ina ia maua'a le gagana Samoa a le fanau. E fa'ailoa atu o le a lilifa a'oga a le fanau i le kuata fou, i itū e fa o le soifua maloloina; **ola fa'aleagaga, fa'aletino, fa'alemafau** ma le ola **pulea o**

lagona. Fesoasoani ane i tautalaga a tamaiti e fa'atatau i le manulauti o le gagana Samoa mo lenei tausaga; ***Tapena Sou Ōso Mo Lau Malaga.*** Ole ulutala lea o tauvaga tautalaga a le a'oga ma va-o-a'oga.

O se avanoa fo'i e a'oa'o ai ia gagana mo tu ma aga 'ese'ese, fa'atinoga o fe'au, kukaina o se taumafataga, tatalo 'ese'ese, folafolaga o fa'aaloalo, fa'afeiloa'iga o tagata, ma le tele o vaega taua o le aganu'u Samoa.

E talosaga atu pea ina ia outou utagia ia le vavao a le malō ina ia vave ai ona tete'e atu i lenei fa'ama'i ma toe vave ai ona ave'ese ia noanoataga o loo tatou iai. O le a taumafai pea i auala 'ese'ese e logo puiali'i lo outou pa'ia mo lo outou silafia lautele. O le a iai lea i luga o le Upega o Feso'ota'iga, Upega o Fesagaga'iga a le a'oga, emeli fa'apea leitiō.

Fa'amolemole a fa'afeso'ota'i mai a'i i le emeli principal@suttonpark.school.nz po'o le telefoni 021-250-6684 pe a mana'omia se fa'amalamalamaga po'o se fesoasoani. Tatalo pea ia malutia outou i 'a'ao alofa o lo tatou Atua a o tatou valavala ai.

Fa'atili Iosua Esera.

Tumuaki/Pulea'oga/Puleako

Master of Education [Merit]